

# “Casa de Colombia” tin fundeshi caba

**ORANJESTAD** – Ayera tardi, presidente di Asociacion Amigos de Colombia (Asocol), sr. Nicolas Ponson hunto cu un grupo di boluntario tabata bashando e fundeshi unda lo wordo construi e proyecto bandera di e fundacion aki, esta “Casa de Colombia” na Bushiri.

Desde cu e asociacion aki a wordo lanta mas cu 22 aña pasa su directivanan semper a percura pa bira realidad e soño di construi nan propio sede, pero principalmente nan “Casa de Colombia” na Aruba. Un cas cu su meta ta integracion y socialisacion entre e Colombianonan y henter comunidad di Aruba. Sr. Ponson a bisa cu e cas aki no solamente ta di e comunidad Colombiano sino di tur amigo di Colombia.

## Proyecto

E idea pa bin cu un proyecto asina a bini di un di e fundadonan di Asocol, sr. Hendrick Croes. Nan a adkiri un tereno pa construi e Casa di Colombia. Nan a logra un bon tereno pero mirando cu e tempo a pasa y nada a wordo haci, nan a perde practicamente e tereno. E hunta di directiva anterior especialmente dos dama, Marielis Tejedas y Marebil Redondo a percura pa haya e tereno bek. “Nos a sigui cu e labor cu nan a cuminsa y nos ta spera di por sigui cu e proyecto aki, ya sea paden of pafo di e hunta directiva di Asocol”.

Sr. Ponson a laga sa cu esaki ta e di dos fase di e proyecto aki. E prome fase tabatin di haber cu limpieza y adaptacion di e tereno di 2.170 meter cuadra. Nan a marca e tereno y nan a pone e heronan di e fundeshi. E di dos fase tabata uno mas exigente,



ya cu nan mester a marca e tereno cu presencia di personal di DOW pa asina tene cuenta cu e penchinan. Ayera finalmente nan por a cumpli cu e fase aki pa motibo di e bahamento di e prijs di concret di parti di e compania Atco. Te aworaki a wordo inverti alrededor di 50 mil florin den e dos fasenan aki.

“Nos ta contento di por a realiza e di dos etapa aki. E proceso aki no tabata facil, pero nos a subi e train aki y danki na Dios nos ta hibando riba un bon caminda tur nos proyectonan”, el a declara na Bon Dia Aruba.

## Construccion

E area cu a wordo basha fundeshi ta mas cu 1.270 meter cuadra. E tin di haber mas tanto cu e infraestructura central di e Casa di Colombia. E area aki tin di haber cu un salon grandi di evento social of conferencia, salon pa duna les y programa social,



y un espacio pa asina finalmente Asocol por gosa di un oficina propio. Presidente di Asocol ta agrega cu unabes cu nan tin nan propio oficina nan por ta mas organizado, ya cu un bon organizacion ta importante pa evita erornan cu eventualmente nan por a yega di comete.

Sr. Ponson a bisa cu esaki ta un oportunidad pa gradici tur esunnan envolvi directo y

indirectamente cu e proyecto aki. “Nan ta hopi hende. Tambe mi ta contento cu e team di trabou di e hunta directiva di Asocol cu a realiza un trabou duro sacrificando tempo di nan propio famia tambe”, el a bisa.

El a bisa cu e directiva di Asocol tin un aña ainda pa sigui cu nan trabou y nan lo haci tur nan esfuerzo pa e proyec-

to aki por logra un bon desarrollo. “Ya e pueblo lo haya sa cual tabata nos gestion, esta si nos por sigui of nan lo eligi otro hende cu lo tin mas capacidad of mesun capacidad di gestion cu nos”, el a declarar.

## Fondo

E directiva di Asocol lo desea di bin cla cu full e proyecto aki, pero e ta un proyecto grandi cu ta demanda un inversion di alrededor di 1 milyon florin. Nan ta tratando di baha e gastonan danki na e colaboracion di boluntarianan. Pero nan ta consciente cu dificilmente nan por logra e meta aki den un aña. “E ta dificil pero no imposibel”, el a bisa. Un forma pa haya fondo ta dor di nan actividadnan como esun di 20 di Juli, relaciona cu Dia di Colombia. Pero tin biaha e actividad no ta produci e fondo cu nan tabata desea.

Nan a yega di realiza e campaña di donacion di bloki, pero e campaña aki no a produci e resultado cu nan tabata spera. Nan a realiza dos actividad di donacion di bloki, ya cu nan obhetivo tabata cu di un comunidad di 19 mil Colombiano na Aruba por lo menos cada un di nan lo por duna un bloki y asina logra tur e blokinan posibel pa e construccion aki. Pero na final solamente nan por a recauda 6 palet di bloki so di un total di 120 palet cu nan tin mester di dje. E demas palet Asocol a cumpra nan cu e placa cu nan a recauda di nan actividadnan.

Pa continua cu e proyecto aki nan a tuma contacto cu diferente comerciante y empresario cu tin masha aprecio pa e comunidad Colombiano, y nan ta dispuesto pa contribui cu e Casa di Colombia. Di otro banda, e hunta directiva di Asocol a bin cu un medida mas stricto encuanto uzo di nan fondo pa asuntonan di ayudo social. Ya cu nan meta ta di canalisa tur e recurso di nan actividad pa bira realidad e Casa de Colombia. A pesar di esey nan a sigui brinda asistencia social den caso di calamidad entre otro ora cu mester transporta e restonan mortal di un Colombiano cu a fayece tragicamente pa su pais natal. Tambe Asocol a brinda ayudo na Colombianonan cu a sufri algun accidente y mester di ayudo hospitalario. □

